



Sesida dals

Communitgà ils

Protocol nr.

12 da december 2023

14 da december 2023

953/2023

Dumonda Maissen

concernent il rinforzament e l'optimaziun da la collavuraziun da las autoritads da
persecuziun penala

Resposta da la Regenza

Tar la dumonda 1: La Procura publica tira gia oz a niz cumplainamain sia libertad d'agir giuridica ed effectiva cun las resursas ch'èn avant maun. Ils cas ston adina vegnir manads tenor las prescripziuns dal stadi da dretg e da la procedura penala, sco p.ex. dretgs da las partidas. Quai po dentant ir sin donn e cust da la «effizienz temporal». La Procura publica examinescha permanentamain l'elavuraziun dals cas e tschertga adina andaments anc pli effizients per ademplir optimalmain il dretg statal da chastiar. Sche questa dumonda tematisescha la cumponenta temporal, saja renvià al fatg, che l'elavuraziun effizienta dals cas stat adina en ina relaziun da tensiun cun scleriments detagliads e per part cun las aspectativas da las dretgiras. La collavuraziun tranter la Procura publica e la Polizia chantunala è optimala.

Tar la dumonda 2: Tenor l'art. 4 al. 1 dal Cudesch da procedura penala svizzer (CPP; CS 312.0) èn las autoritads penalas independentas en l'applicaziun dal dretg e sutta-messas mo al dretg. Tenor l'art. 14 al. 5 CPP reglan ils chantuns la surveglianza da lur autoritads penalas. La regulaziun legala en il Grischun restrenscha la surveglianza da la Procura publica ad ina surveglianza ierarchica administrativa tras la Regenza. La surveglianza professiunala vegn fatga en il cas singul tras las dretgiras. La surveglianza tras la Regenza cumpiglia en emprima lingia l'examinaziun da l'andament extern da las fatschentas (finamiras strategicas, rapport da gestiun e.u.v.) e da l'observaziun dal princip d'acceleraziun. Cuntrari al chantun Turtig n'exista nagina basa legala, tenor la quala la Regenza po metter prioritads per la Procura publica en la persecuziun penala. La cumpetenzza da dar directivas è perquai restrenschiada a dumondas administrativas, auter che p.ex. tar la Polizia chantunala. Pervia dal princip da l'indipendenza resulta in scumond d'intervenziun, uschia che la Regenza na po betg dar directivas a la Procura publica en il cas singul. Perquai n'èsi er betg pussaivel da prescriber a la Procura publica, ch'ella introduceschia uschenumnadas proceduras sveltas. Il medem vala per l'applicaziun da mesiras d'opportunitad concretas. La Procura publica è sa declarada pronta da discutir davart la priorisaziun e davart

la fixaziun d'accents, en enclegientscha cun il Departament da giustia, segirezza e sanadad e cun la Polizia chantunala, sco er da realisar talas mesiras dapertut là, nua ch'ellas augmentan l'effizienz.

Tar la dumonda 3: En emprima lingia ston vegnir realisadas las mesiras e cuntanschidas las finamiras ch'èn fixadas en il Program da la Regenza 2025–2028 ed en l'examinaziun da las incumbensas e da las prestaziuns (EIP). Per reducir la lavur administrativa ed il volumen da datas sa servan la Procura publica e la Polizia chantunala gia oz da datas cuminaivlas ed intensiveschan la collavuraziun en champs definids. En connex cun la prelevaziun da facultad en il sector da la criminalitad organisada vegnan actualmain manadas tractativas da cooperaziun cun las autoritads turitgaisas. En il sector dal barat da datas automatisà tranter ils chantuns ed entaifer il chantun ston vegnir stgaffidas basas legalas per cuntanscher ina collavuraziun pli effizienta. Cun la realisaziun dal project Armonisaziun da l'informatica en la giustia penala (AIGP) vegn prendì en mira la finala in barat da datas automatisà. La collavuraziun tranter la Polizia chantunala e la Polizia da la citad da Cuir è optimala. La delegaziun d'incumbensas e da cumpetenzas a la Polizia da la citad vegn examinada cuntinuadamain areguard l'effizienz ed areguard l'efficacitad. Sche necessari vegnan fatgas adattaziuns. Tar las ulteriuras vischnancas defineschan la Constituziun chantunala e tranter auter la Lescha da polizia dal chantun Grischun (LPol; DG 613.000) la collavuraziun e las incumbensas ch'èn attribuidas a las vischnancas.

Tar la dumonda 4: Questa dumonda è vegnida explitgada en la resposta a l'incumbensa Adank (conclus da la Regenza dals 29-08-2023, prot. nr. 700/2023) concernent meds legals efficacis cunter la criminalitad liada a l'acquisiziun da drogas. La situaziun po mo vegnir meglierada tras mesiras complessivas. Quai è ina incumbensa cuminaivla da las vischnancas e dal chantun sin plaun politic sco er sin plaun professiunal. La Strategia chantunala Dependenzas ch'è vegnida elavurada per incumbensa da la Regenza, concerna quest sector tematic. La realisaziun consequenta dals champs d'acziun e da las mesiras definidas en tala, duain gidar a megliar la situaziun en il sector da la problematica da dependenza ed a reducir la criminalitad liada a l'acquisiziun da drogas. Tut las mesiras èn incumbensas permanentas senza orizont da temp specific.



En num da la Regenza

Il president:

A stylized, handwritten signature in black ink, consisting of several loops and a long horizontal stroke.

Peter Peyer

Il cancellier:

A stylized, handwritten signature in black ink, featuring a series of sharp, angular strokes.

Daniel Spadin